



## 便所

記得，細漢時節外阿婆屋家个便所在屋側角个豬欄脢，便所四圍个壁係用枋釘个，門口一條褪色褪色个紅花布門簾，裡肚个屎缸係一個當大當深烏疏疏个窟，面頂用兩埕枋架緊，這兩埕枋斯係踏腳个位所，長年透天臭尿穢。日時頭去便所，日頭花會對壁頂个枋縫照入來，毋使點電火；暗晡頭愛便所，斯愛先擰開頭那頂該葩五燭个電火珠，在搖來搖去、黃黃暗暗个電火下屙屎、屙尿。

在阿舅去做兵个該站時間，阿姆毋放心外阿婆一個人戴，斯同還言讀書个侄並阿哥送去同外阿婆做伴。吾兩儕逐日跔外阿婆過家寮，也會同鄰舍个細姪招招邀邀滿山滿坪去拈蛇打蚓，逐日都搞去歸身泥混混，愛外阿婆緊咻正肯轉。食飽夜，外阿婆會掌緊電視看「楊麗花歌戲(gua' hi)」，吾等看毋識，日時頭也搞去恹咧，斯在脢頂坐緊啄目睡。在外阿婆屋家戴萬項好，盡驚斯係暗晡頭尿出想屙屎，外阿婆毋肯吾等在厰間頂个尿桶屙屎，定著愛吾等去豬欄脢个便所屙。想著愛行去該暗摸胥疏个屋側角，草埔肚蟲聲唧唧，還有該一下近、一下遠个夜鴉叫聲「嗚！嗚！」實在還得人驚，若使得忍得核斯硬忍緊較贏啦！

有一擺，侄正經忍毋核咧！拜託阿哥同侄共下去便所，阿哥擎緊手電，企在便所外背等，侄掀開便所門簾，阿哥用手電照核分侄擰開該葩五燭个電火了後，正同門簾放落來。侄跔在屎缸枋頂，風呼呼滾對枋縫吹入來，枋釘个壁砵砵確確(kid` kid` kog` kog`)響，電火珠晃晃甩(gong` gong` hainn)。黃黃个電光照核吾烏烏个影，映在壁頂一下大一下細，想著下晝上屋阿龍哥講个：厰學校同學在便所屙屎，有一隻青青个手對屎缸肚伸出來同佢掙尸拙。恹著這，侄試著尸拙涼涼、一下斯雞嫫皮膨膨起，目珠毋敢看往下，驚都心臟硬硬愛跳出來。含核目汁喊阿哥，阿哥無應，單淨聽著豬欄肚个豬嗶嗶(go` go`)滾，侄過大聲喊阿哥，阿哥出聲問：「做麼个？無衛生紙係無？」侄遽遽屙好，褲袵揪好斯跳緊出來，拉核阿哥飄轉廳下。外阿婆看電視看去迷迷迷，毋知侄險險嚇死在便所肚。

恁久恁久，外阿婆會拿長柄个杓嫫去屎缸舀肥，裝在肥桶肚，拔去菜園淋菜。外阿婆會敬兜水，講恁泥正毋會同菜鹹死。外阿婆手板已好，種个菜又靚又大頭，食毋去還會分分鄰舍搨食呢！阿舅做兵轉來，翻轉年愛討舖娘，整理新娘間，順續起過化學便所，便所在屋家肚，地泥同壁做下有貼「タイル(tai` lu')」，電火光光光，屙屎、屙屎水一沖斯淨淨俐俐，連味都無，實在還素絲啦！打幫恁泥，去外阿婆屋家寮，都毋使過驚暗晡頭想愛屙屎咧！

便所，實在係生活中當重要个設備，這下个人還較好命，科技發達，便所也跔緊進步。寒天驚坐在冷冷个馬桶面頂仰係屙屎懶尸掙尸拙，使得鬥「免治馬桶」，用手指一扼，斯會有燒暖个馬桶座好坐、還會有燒燒个水同若尸拙沖淨，實在當利便。若還有機會分外阿婆試下看，佢定著會笑去咕咕(kid` kid`)滾啦！

作者：徐姿華

### ☆詞彙學習☆

【招招邀邀】zheu+ zheu+ rheu+

rheu+：呼朋引伴。

【滿山滿坪】man+ san+ man+ piang`：

滿山遍野；到處。

【泥混混】ne` gun` gun`：滿身泥巴，

骯髒的樣子。

【迷迷迷】mi` mi` mi`：形容專注、凝神的樣子。

【手板】shiu` ban`：指手的動作速度或手藝能力。

【化學便所】fa` hog` pien` so`：現代化的沖水馬桶。

【タイル】tai` lu`：磁磚。